

novembar



NOVOSTI

FONDACIJA HASTOR DODIJELILA
STUDENTIMA SA PODRUČJA
ČITAVE BOSNE I HERCEGOVINE

208

 stipendija

20

FONDACIJA HASTOR

15



Sjedište Fondacije Hastor u mjesecu novembru bilo je središte susreta svih studenata koji su iz raznih dijelova Bosne i Hercegovine u Sarajevo stigli povodom jednog posebnog i radosnog čina. Naime, Fondacija Hastor je ove akademske godine obradovala 208 studenata potpisivanjem ugovora o stipendiranju, a u decembru će dodijeliti i dodatnih 15 stipendija studentima koji do sada nisu bili dio Fondacije Hastor

U posljednjim otkucajima novembra, zadnjem izdisaju jeseni, kroz maglu i pregršt boja stigli su i novi počeci za naše studente. Jedanaesti mjesec u znaku novih ispita, učenja, prepreka i bujica nade za budućnost, a s tim i ulazak u novu godinu stipendiranja.

Naime, naša Fondacija je i ove godine, nakon uspješno potpisanih ugovora sa stipendistima osnovnih i srednjih škola, u subotu, 14. novembra u sjedištu Fondacije Hastor održala i svečano potpisivanje Ugovora o stipendiranju i sa stipendistima-studentima svih Univerziteta u BiH.

U septembru ove godine, Fondacija Hastor dodijelila je 1170 stipendija osnovcima i srednjoškolcima, od čega je 280 novih članova. U subotu 14.11.2015. godine potpisano je 208 Ugovora o stipendiranju sa trenutnim stipendistima-studentima koji su nastavili svoje školovanje i ispunili sve kriterije za nastavak daljeg stipendiranja. U decembru ove godine, Fondacija Hastor će dodijeliti i dodatnih 15 stipendija studentima koji do sada nisu bili dio Fondacije Hastor, a koji su aplicirali na nedavno zatvoren konkurs za studentske stipendije u akademskoj 2015/2016 godini.

Sa potpisivanjem ovih ugovora, studenti su prihvatili pravila i obaveze koje kao članovi ove organizacije moraju ispunjavati da bi ispunili kriterije za redovno stipendiranje.

U 2014/2015. akademskoj godini s ponosom smo proslavili uspjeh 16 bachelora i magistara nauke iz različitih naučnih oblasti. Sa nadom za još boljim rezultatima, zvaničnim čestitkama našeg direktora Seida Fijuljanina i cjelokupnom ekipom Fondacije Hastor uspješno smo zakoračili u još jednu godinu stipendiranja.

NAŠE STIPENDISTICE IZ KALESIJE USPJEŠNO IMPLEMENTIRALE PROJEKAT MALI ENGLEZI ZA UČENIKE OSNOVNIH ŠKOLA

Naši stipendisti svakodnevno, kroz razne aktivnosti, unapređuju lokalnu zajednicu, ali i obrazovanje. Primjer tome su naše stipendistice iz Kalesije koje su odlučile pokrenuti projekat koji ima za cilj promociju važnosti učenja engleskog jezika. Fondacija Hastor pozdravlja ovaj projekat i ponosi se našim stipendisticama koje su odlučne u namjeri da svojim znanjem i sposobnostima doprinesu svojoj lokalnoj zajednici i učine je jednim boljim mjestom.

Stipendistice Fondacije Hastor i učenice četvrtog razreda Mješovite srednje škole Kalesija Dina Osmanović, Emina Šljivak i Nermina Ramić, su zajedno sa svojim kolegama i kolegicama iz školske sekcije za engleski jezik uz koordinaciju nastavnice Sanele Šarić, organizirale projekat Mali Englezi koji ima za cilj promovisanje važnosti učenja engleskog jezika. Ciljna skupina projekta su učenici osnovnih škola, od petog do devetog razreda. Bitno je istaknuti da su prijave za ovu radionicu potpuno besplatne.

Naše stipendistice se mogu pohvaliti ne samo ovim projektom, nego i mnogobrojnim aktivnostima iz različitih sfera društvenog djelovanja. Dina je koordinatorica lokalnog tima ASuBiH Kalesija, članica ekološke sekcije, sekcije prve pomoći, učesnica konferencije o klimatskim promjenama. Emina voli svoje slobodno vrijeme provoditi radeći zadatke iz matematike, čitajući knjige, baveći se sportom, te crtajući. Nermina također voli da čita, ali i da piše, članica je lokalnog tima ASuBiH Kalesija, te članica Vijeća učenika u MSŠ Kalesija.

Jedna od kreatorki ovog projekta, Dina Osmanović, je s nama podijelila nekoliko bitnih stavki o projektu:

"Cilj nam je da poboljšamo kvalitet nastave engleskog jezika. Dugogodišnje

gledano ovaj projekat će da poboljša uvjete izvođenja nastave engleskog jezika ali i da učenicima olakša učenje i usvajanje jezika. Projekat će se realizovati na način da članovi sekcije održavajući radionice učenicima osnovne škole od petog do devetog razreda pomognu u usavršavanju engleskog jezika. Radionice će biti interaktivnog karaktera uz izvođenje predstava, a smislit će ih članovi sekcije uz pomoć profesorice. Očekuje se da na radionicama uzme učešće između 50 i 100 učenika osnovnih škola."



Mi iz Fondacije Hastor smo jako ponosni jer naši stipendisti uvijek traže i pronadu način kako poboljšati svoju lokalnu zajednicu. Učenice MSŠ Kalesija su samo jedan od mnogobrojnih primjera kako se treba djelovati na poboljšanje svoje sredine. Upravo to je jedna od najbitnijih vrijednosti koja se provlači kroz djelovanje Fondacije Hastor svih ovih godina.

Također smo iznimno ponosni jer su naši prijatelji iz Fondacije Mozaik, kroz projekat Omladinske banke, prepoznali i podržali ovu aktivnost.

N. Ohran

NOVI PRIJATELJI FONDACIJE HASTOR

Oktobar je mjesec u kojem se možemo pohvaliti da smo postali bogatiji za nekoliko novih prijatelja. Ovom prilikom im se želimo zahvaliti što su prepoznali rad Fondacije Hastor.

OBRTNIČKA RADNJA
LEON



MEHIĆ MEHMED

- najuspješniji stipendista-student Fondacije Hastor u akademskoj 2014./2015. godini

Obrazovanje je izbor pobjednika - moto je Fondacije Hastor, ali i svih naših stipendista. Na putu ka uspjehu naši stipendisti bilježe sjajne rezultate kojima se Fondacija izuzetno ponosi i svaki njihov uspjeh doživljava kao svoj. Fondacija slavi uspjehe svojih stipendista, a oni najuspješniji vrijedni su spomena.



„...Podrška Fondacije Hastor se ne može opisati, jednostavno, da nije bilo fondacije, vjerovatno bih otišao studirati negdje u inostranstvo, ali baš zbog Fondacije Hastor sam ostao na studiju u BiH. Vjerujem u Fondaciju Hastor, našu misiju i moto: 'Obrazovanje je izbor pobjednika!' Definitivno istina, sve mi mogu uzeti, ali znanje, snalažljivost i moral ne mogu...”

Fondacija Hastor je oduvijek bila mjesto susreta mladih, kreativnih i inteligentnih ljudi koji u životu žele postići više ciljeve. Upravo jedan takav primjer jeste i Mehić Mehmed, student druge godine Muzičke Akademije u Sarajevu i stipendista Fondacije Hastor.

Mehmed je danas među najuspješnijim studentima svoje godine na Muzičkoj Akademiji u Sarajevu sa izuzetno visokim prosjekom od 9,65. Veliku motivaciju za rad i učenje pružila je

Fondacije Hastor, i materijalno, i moralno. Važno je spomenuti da je Mehmed stipendista još od osnivanja Fondacije.

Mehmed svira klavir, klavijature, gitaru i trenutno uči svirati novi instrument - udaraljke. Trenutno je klavijaturista u jednom sarajevskom bendu što mu predstavlja odličan vid praktične primjene naučenog, uzmemo li u obzir da se na njegovom fakultetu fokus stavlja na praksu i samostalan rad. Pored navedenih aktivnosti, Mehmed je, prethodne godine volontirao u administraciji Fondacije Hastor. Stečeno iskustvo naučilo ga je odgovornosti i radnoj etici. Unaprijedio je znanja i vještine neophodna u svakodnevnom životu.

Što se tiče planova za budućnost, Mehmedova želja je da se bavi studijskom produkcijom radeći kao producent. Mehmed planira ostati u svojoj zemlji.

Svestranost, inteligencija, kreativnost, optimizam, ambicioznost i pozitivna energija – sve su ovo karakteristike koje krase našeg mladog, ali izuzetno uspješnog stipendistu.

E. Adilović



Bez muzike, naš život bi bio greška.

— Friedrich Nietzsche

NOVEMBAR 2015

Komisija za dodjelu stipendija Fondacije Hastor nije odobrila potpisivanje ugovora jednom broju stipendista zbog neispunjenja obaveza preuzetih pri potpisivanju prošlogodišnjeg ugovora. Kad su shvatili grešku pisali su izvinjenja u kojima priznaju da su prekršili pravila i mole da im se pruži još jedna šansa. Evo šta su pisali studenti koji su ostali bez 250 konvertibilnih maraka mjesečnih primanja.



K. Sabira, Tehnički fakultet piše: „Imala sam predavanja subotom, a nedeljom nisam imala liniju koja mi odgovara za putovanje da bih volontirala.“

H. Ahmet, Biotehnički fakultet piše: „Imao sam tokom oba semestra predmete koje su predavali vanjski saradnici to jest profesori iz Sarajeva, Tuzle, Banje Luke, Teslića – slabo smo imali slobodno. Nisam održavao mjesečne sastanke. Ovom prilikom se izvinjavam. Opekao sam se. Ostao sam bez 250 konvertibilnih maraka mjesečno, a teško je gledati roditelja kako izdvaja pare iz svog novčanika, a pri tom finansira još tri sina i kćer.“

F. Hasena, Pravni fakultet: „Ja sam objašnjavala administraciji Fondacije Hastor da imam poteškoća sa volontiranjem. Žao mi je što nisam ispunila svoje obaveze, ne samo iz razloga ostajanja bez stipendije nego mi se volontiranje čini veoma zanimljivim. Vama dugujem jedno veliko izvinjenje i izražavam duboko kajanje. Upisala sam drugu godinu redovno, a i od vas očekujem radosnu vijest.“

Š. Azema, Pedagoški fakultet: „Za početak se izvinjavam zbog svoje neodgovornosti. Znam da je moja greška. Nadam se da ću imati priliku da je ispravim. Volonterske aktivnosti nisam obavljala jer se nisam mogla organizovati oko dodatnog prijevoza. Tako da nisam volontirala. Opet uočavam svoju grešku trebala sam kontaktirati administraciju Fondacije Hastor i obavijestiti o tome. I ubuduće ću se truditi više, jer mnogo mi znači ova stipendija. Hvala unaprijed.“

P. Demir, Medicinski fakultet: „... kao prvo ja se najiskrenije izvinjavam radi mojih izostanaka koji su razlog zbog kojih nisam mogao da budem prisutan na istim a i najiskrenije se nadam da ćete ih i vi uvažiti i prihvatiti. Sve vam mogu dokazati Rasporedom gdje se vidi da su i subote zauzete, kao i Pravilnikom studiranja.“

Đ. Elvira, Fakultet političkih nauka: „Nisam mogla da se uklopim u novu sredinu na fakultetu, nisam mogla odgovoriti obavezama, ali vas molim da mi pružite još jednu šansu.“


Č. Miralem, Mašinski fakultet piše: „Razlog zbog kojeg nisam prisustvovao posljednja tri sastanka je bolest moje majke. Imala je operaciju i ja sam bio čitavo vrijeme uz nju. Također sam imao vježbe subotom, tako da je i to razlog što nisam bio na sastanku. U aprilu nisam mogao doći jer sam imao ispit.“

Uvažavajući da su pomenuti stipendisti narušili Ugovornu obavezu Komisija za dodjelu stipendija Fondacije Hastor prekida im dalju isplatu stipendija. Na ovaj način je poslata poruka svim ostalim stipendistima da se neće tolerisati neispunjenje Ugovornih obaveza.



FONDACIJA
HASTOR

/ OBJEKTIV




Emina Bilajac



Emina Bilajac




Emina Bilajac



Emina Bilajac


Tesnim Karišik (Sarajevo) & Emina Bilajac (Ključ)
Više fotografija pogledajte na:
Tesnim Photography
Fondacija Hastor facebook fan page




Tesnim Karišik



Tesnim Karišik



Tesnim Karišik



Emina Bilajac



Tesnim Karišik



Tesnim Karišik

SADŽIDA KOSOVAC

Zbog svoga angažmana u radu Fondacije Hastor za stipendisticu mjeseca je izabrana Sadžida Kosovac, studentica druge godine Mašinskog fakulteta u Sarajevu.

Sadžida je već sedam godina dio Fondacije Hastor, koja je prati od osnovne škole i podstiče da se još više trudi i zalaže radi ostvarivanja većih uspjeha. Voli prirodu i planinarenje, kao i kreativno crtanje i pisanje. Iako je društvena osoba, najviše voli slobodno vrijeme provoditi u čitanju knjiga i isprobavanju novih hobija. Također nastoji ići na razne kurseve, seminare i kreativne radionice, jer želi da stekne nova znanja, iskustva i poznanstva. Ovaj mjesec, Sadžida je bila izuzetno posvećena osmišljavanju ručno izrađenih zahvalnica za članove Kluba prijatelja Fondacije Hastor. Uz pomoć svojih kolega Marizele, Armine, Marine, Taise i Berine i Muharema pripremila je preko 100 jedinstvenih zahvalnica za članove Kluba prijatelja Fondacije Hastor.

Ona ističe da bez podrške roditelja, prijatelja i Fondacije Hastor ne bi uspjela prekriti neke svoje želje, kao i izgraditi svoju ličnost i raditi na daljem usavršavanju. Jedna od želja joj je da u toku školovanja stekne praksu u bh. i inostranim firmama i na taj način unaprijedi svoje radne sposobnosti koje će je pripremiti za željeni posao nakon završetka studija.

Fondacija Hastor je bila velika prekretnica u mom životu. Razbila je melanholiju osnovne i srednje škole, a sad uljepšava i moje studentske dane. Pomogla mi je da napravim prve korake u potrazi za vlastitom srećom, da istupim sa druge strane straha i suočim se sa problemima koji mi stoje na putu ka ostvarenju željenih ciljeva. Naučila



me da se uvijek trebam truditi da postanem bolja nego što sam bila jučer, jer život neće postati lakši. Osim mnogo iskustva pružila mi je i prilike da iskažem svoje ideje i kreativnost. Ovdje sam stekla i velika poznanstva i prijatelje širom BiH sa kojima dijelim slične interese, kao i nezaboravne trenutke.

E. Adilović

PISMO MJESECA

Poštovani iz Fondacije Hastor,

Mnogo mi se svidjelo druženje koje ste nam omogućili u Sarajevu odnosno mjesečni sastanak studenata koji se održao početkom ovog mjeseca. Svidjela mi se prezentacija, a posebno igrice upoznavanja, kada su studenti 2, 3, i 4. godine morali da pronađu bruću te da ga predstave ostatku društva. Upoznali smo ljude koje najvjerovatnije ne bi upoznali nikada. Bila sam sretna kada sam ušla u salu gdje se održavao sastanak. Osjećala sam neko veliko

poštovanje. Nakon 6-7 godina upoznat ću ljude koji me toliko godina bodre, guraju me naprijed i olakšavaju moje školovanje. Pomalo je jezivo znati da te određeni ljudi nikada nisu vidjeli, osim sa fotografija koje uslika učitelj Ramo prilikom potpisivanja ugovora ili posjete našim sastancima, a ipak te ne zaborave ni jedan mjesec u godini. Da bi te stvari radio, jednostavno moraš da budeš čovjek, da se suosjećáš sa ostalima i da voliš da pomažeš ljudima. To vi upravo i radite. Pomažete nam, ne očekujući od nas ništa drugo osim da se obrazujemo, a i to što radimo ide samo nama u

korist. Veoma se radujem sljedećem sastanku i svojim novim obavezama. Raduje me to što ću i ja početi volontirati. Iskreno, voljela bih da to bude neka osnovna škola, ali to je Vaša odluka i prihvatit ću je kakva god da je i naravno truditi ću se da ispunjavam redovno svoje obaveze.

Toliko od mene u ovom pismu.

Srdačan pozdrav,
Zahvalna Jasmina Medinić
Brčko, 21.11.2015.

IMPRESUM

FONDACIJA HASTOR

Bulevar Meše Selimovića 16.
71000 Sarajevo
033 774 789
033 774 823
fondacija@hastor.ba

REDAKCIJA

Džulisa Otuzbir
Sadžida Kosovac
Hanka Mujkić
Nihada Ohran
Emina Adilović
Nadira Berbić